

四庫全書

集部

欽定四庫全書

集部

北郭集卷一至三

詳校官庶吉士<sub>臣</sub>李傅熊

中書<sub>臣</sub>劉源溥覆勘

總校官知縣<sub>臣</sub>楊懋珩

校對官編修<sub>臣</sub>盧遜

謄錄監生<sub>臣</sub>趙廷璋

欽定四庫全書

集部六

北郭集

別集類五

明

提要

臣等謹案北郭集六卷明徐賁撰賁字幼文其先蜀人徙常州再徙平江張士誠開閫辟為屬官賁與張羽俱避居湖州之蜀山洪武七年被薦至京嘗奉使晉冀有所廉訪及還檢其橐惟紀行詩數首太祖悅授給事中歷

官河南左布政使會征洮岷兵過其境坐犒  
勞不時下獄死明史文苑傳附載高啟傳中  
賁善畫亦工於書李日華六研齋筆記稱其  
楷筆秀整端慎不為沓拖自恣詹景鳳小辨  
亦稱其小楷法鍾蕪虞然皆拘拘法內蓋其  
天性端謹不踰規矩故其詩才氣不及高楊  
張而法律謹嚴字句熨貼長篇短什並首尾  
溫麗於三家別為一格其客吳時嘗居城北

之齊門故名集曰北郭舊本為吳人張習編  
次今是集前後無序跋題曰陳邦瞻校蓋萬  
歷間重刻之本又非習所編之舊矣乾隆四  
十六年十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

欽定四庫全書

郭集卷一

樂府  
詞吟

古別離

清晨戒嚴裝送別河之干北風塞上起黃沙浩漫漫水  
雪日以繁徒旅日以寒不悲道路遠所愁衣裳單從行  
義不可徒使推心肝流光信奔馳君歸有時待但惜少

明 徐賁 撰

年去坐令顏色改

上留田

羽翼偏不能飛上留田車輪單安可馳上留田有弟有弟寒且飢上留田為其兄者知不知上留田父母既沒鞠者為誰上留田

五襍組

五襍組機上絲往復還盤中棊不獲已人別離  
五襍組園中花往復還陌上車不獲已人無家



行路難

桃李不冬發寧識霜雪威丈夫不出門安知道路危渡  
河恐傾覆登山苦嶮巖假問何乃爾言有名利羈名利  
孰不志命繫造化為請君勿躁進藏器且待時

巫山高

巫山峯十二一一向陽臺聞說君王夢曾逢神女來樹  
色悽離恨猿響抱餘哀至今雲雨裏徒使後人猜

邯鄲才人嫁為廝養卒婦

妾本邯鄲富家女學得詩書絕歌舞小時恩例選入宮  
天顏一顧生春風崇臺往來十五載玉容無復桃花紅  
君王寵新盛開宴還同賤妾初時見君邊銀燭照華筵  
妾處秋螢開涷院當時自喜才名人如今始信詩書貧  
辭君去嫁廝養卒不怨君王怨妾身

折楊柳

人言折柳愁我言折柳好倘向柳邊行識君去時道

名都一何綺

名都誇綺麗千門爭向開射熊舊闌館迎鳳新築臺盡  
數金吾過駿馬玉璫來縱橫九衢裏日日逐塵埃

神絃曲

靈風颭旗日光黑燈影半明斜照壁湘筠颯颯泣慘悽  
翠裙香帶蘭葉齊跳梁絳鼠舞碧鷄神鴉飛出寒烟啼  
紙錢嘯火高懸樹千輪萬騎登天去

神絃別曲

桂葉吹香楚花雨十二離鸞夢中語綠蛾紺髮團作雲

高軒夜降巫山女金爐蕙氣烈火濃  
畫簾羅幙春重重  
翠樽進酒樂未終  
衆巫笑起鼓鼙燭光倒射椒花紅

從軍行

裝刀不用金立身不在文  
昨日破却郾歸來論功勲  
君王更部位官屬  
馮將軍

別離曲

山風吹霜榆葉老城鴉  
傳聲天欲曉征徒出門駕行裝  
斗杓倒懸月無光  
我停露車客停馬荒烟蕭蕭暗平野

一盃濁酒且須傾九月垂楊不堪把歌聲感激絃聲繁  
坐上醉人爭笑喧相逢相別皆草草心事如絲向誰道  
新嫁娘效王建

隣里爭來賀三朝禮數頻只是羞擡眼識卽猶未真  
五索效韓偓

為性好梳裹料髻更均腮手把百神鏡千回自照來可  
憐手無力從卽索鏡臺

昨日下午河橋多被行人見花稀無處藏見我新粧面一

向不禁羞從卽索羅扇

幾回畏春寒不向庭中走杏花都落盡雨長春苔厚我  
欲掃落花從卽索鸞帚

琵琶性裏好曲調手中便一朝絃斷盡欲接卻無緣待  
彈不可得從卽索新絃

閒將紅色絲結取承露囊一面芙蓉花一面雙鴛鴦不  
藏鍼與線從卽索麝香

新曲效溫庭筠

深宮漏永閑青春象床玉枕綉為裯虹梁日出照明錦  
流蘇風動墮香塵鴛鴦帳裏承恩重睡起鬟斜綠雲擁  
艷舞濃歌女伴誇芳容嬌態君王寵好風景綺窓前  
佳節良辰信可憐點腮試拭花梢粉畫眉還用麝臍烟  
寶釵壓髻犀梳映幾度調粧看不定雙鳳雕成白玉臺  
四龍蟠作黃金鏡粧成只是自焚香絳唇紅靨間明璫  
歛笑藏羞向窓坐時理銀箏更炙簧內家花柳春風早  
桃園杏圓聞黃鳥花鳥撩人可解禁多懽多樂年年好

一從少小擅風流日來歡御鳳凰樓侍奉君王無所願  
上祝萬歲又千秋

切切重切切贈普仲淵

切切重切切相逢復相別君行車有輪我車去無因千  
里更萬里宛轉車輪裏關山路嶮巖行速寧行遲

塞上曲

十五見天子十八領邊兵曾將一羽箭贏得射鵬名

新絃曲



絃頭響清人愛憐曲多彈雜難為絃一寬一緊調復亂  
卻把新絃一齊換新絃換上等要聽舊絃換下誰來看  
舊絃舊絃莫謾悲新絃還當有舊時

采蓮曲

采蓮莫采多采多莖傷手手傷有時好傷我池中藕

蠶婦詞

采桑復采桑采桑未盈筐今年小姑嫁蠶多獨自忙

三婦詞

大婦能刺繡中婦解藏鉤小婦知音樂纖手彈瑩篴上  
客且安坐風光無日休

幽蘭曲

幽蘭不是尋常草長葉叢叢紫花小幾見東風夢裡來  
綠豔烟濃紅日曉瑣窻護春春意暖宛轉清香吹不斷  
美人昨夜度瑤琴白雪新消楚江滿

湘妃曲

蠻娘唱怨鮫房黑冰瑟嘈嘈機罷織寒濃翠薄妬蟬衫

烟梧風竹爛編色鳳聲天遠有誰聞  
雙蛾黛影愁不分  
楚山九點秋未老  
淚花染盡滿湘雲

青樓曲

綺綉列中堂  
羅扇映穠粧  
鈿花新樣製  
釵梁出意長  
藏香詒荀令  
笑指調周郎  
卽不應妙歌舞  
舊得事平陽

洛陽陌

君家天津南  
我家孟津北  
都因看花來  
相逢不相識

青青水中蒲

青青水中蒲織作團團扇不肯贈傍人自掩春風面

道逢鎬武威

昨夜看燈歸道逢鎬武威將燈調人笑連手挽羅衣引  
上東城路邀入他家去都無女伴隨嬌羞不成怒即心  
莫亂想想著直須媒蘭衾胡敢御一夜坐堆堆

龍門有孤桐

龍門有孤桐斲為三尺琴良材不易得軫玉而徽金玲  
玲七絃間一彈清我心要知在自適奚必求知音

將軍行

朝出飛狐塞暮返雲中營提攜燕代卒意氣恣縱橫屢  
奉天子詔萬里得專征霜風寶刀利曉日炫朱明彎弧  
白象斲重鎧文犀成敵騎不敢向三邊盡知名裨校擁  
纛前都護隨鑣行首功不足計當為誇擒生

猛虎行

爾虎從何來據住三叉口昨日啖東家猪今日噬西家  
狗山中百獸不敢鳴白楊黃竹陰風生隣家少年憑意

氣彎弓掛箭尋山行夜深月黑候虎出明朝荒草餘白  
骨

擊筑行和高季迪韻同張記室憲賦

和君擊筑吟請君側耳聽不是更容貌誰能知姓名主  
人莫稱善坐客何須驚酒酣欲罷奏壯心難自平

短歌行贈杜君寅

白日雖苦短萬里落復生人生自有限難極歡愛情愚  
者謀在食知者志在名愚知各有求誰能免經營秋花

容易老秋葉難再榮對酒心已醉酌酒淚先傾我非不  
能遣柰此愁相縈君亦失意人請吟短歌行歌短意自  
長展轉歌莫停

遊仙詞

浮遊虛空界瀟洒飛雲臺靈光照八景真氣凌三台日  
出東皇降月生西母來絳玉裝書爰文螺製酒盃長歌  
忽俛首溟渤揚黃埃

賈客行

賈客船中貨如積朝在江南暮江北平生產業寄風波  
姓名不入州司籍船頭賽神巫唱歌舉酒再拜酹江波  
紙錢百垛不知數黃金但願如其多須臾神去風亦息  
全家散福歡無極相期盡說莫種田種田歲歲多徭役

青絲白馬歌

銀鞍白馬青絲韁容顏花艷少年郎有時繫馬垂楊樹  
逐翠尋香入花去

對鏡詞



蓮壺漏轉銅龍泣露壓香塵玉堦濕欲理殘粧喚鏡來  
恰在石榴花下立犀梳未整寶釵偏綠鬟嬌鬢芙蓉烟  
孤鸞飛入月中去離愁脉脉空嬋娟

宮中夏夜詞

涼露下蓮池雲廊夜步時小鬟痴欲睡頻說斗杓移

扶南曲辭歌

紅日映高樹晴光入綺疏鈿屏開八字銀鑰啟雙魚美  
人曉粧罷流鶯春語初中使簾前立直待上金輿

長歌復短歌四章

長歌長短歌短百歲人生那得滿  
昔不樂今何如少年  
馬用多讀書桑樞甕牖為窮儒

短歌短長歌長男兒有足行  
四方鞍在馬輪在車請君  
莫言道路賒安能局束長在家

長歌停短歌起春風吹入行人耳  
壯年少老日多人生  
有志莫蹉跎致君堯舜當如何

短歌歌長歌續百年碌碌復碌碌  
交者多知者少取次

論心皆草草志士棲遲眼中老

田家行

谿南種田溪北住屋東栽桑屋西樹阿翁八十不出戶  
長男踏車婦織布大女送飯小絡紗幼男放牛未還家  
年年納得官家足篋有餘布甌有粟田家古來多苦辛  
飽煖各自全一身我願子孫親畝畝終身不識離鄉苦  
農父謠送顧明府由吳邑陞常熟

我家茆屋臨官道前種桑麻後梨棗年年力作不違時

人有餘糧牛有草官長下車令五年老身不到州縣前  
鄉無吏胥門戶靜家家盡稱官長賢大男入郭買田具  
始知官長移官去來時憶向官道迎今日去時須送行  
攀轅欲留留不止我民愴惶彼民喜殷勤再拜官道傍  
願飲三江一杯水

漁父篇贈瞿敬夫

身本烟波一釣徒載得全家入五湖耽詩每笑唐高士  
致產能輕越大夫往來不向州城住朝泊西巖夜東渚

筆床茶竈何用將蓬底惟留釣魚具第四橋頭春水多  
朝朝暮暮自經過綠蓑常帶桃花雨白漿頻翻荇葉波  
春風秋月年年好銅斗歌中髯華老閒愁總在醉中消  
樂事從教行處少但取魚來不論遲黃梁綠竹手親炊  
飽時抱釣醒時唱世事於君定不知

柳短短送陳舜道

柳短短春江滿蘭渚雪融香東風釀春暖山長水更遙  
浩蕩木蘭橈蘭橈向何處送君行南昌去離愁落日烟

中樹

白蘋花送王汝器

白蘋花綠藤草南風吹碧波五月湘江道行人勸酒離  
緒多棹女棹郎歌棹歌黃鸝啼時風景好大堤日落奈  
君何君今去不可留山疊疊水悠悠

明月篇贈章子向

商飈拂絳河圓月溢金波澄陰斜映桐池近爽氣遙連  
桂渚多穿櫳窺帳虛塵淨鑒帷照牖芳香冷翫賞何人

倚畫欄瑤華翠羽流空影含情抱琴為調絃絃中新曲  
重堪憐不見嫦娥空歲歲漫思湘女自年年天上人間  
秋浩浩此時此景誰家好陳王園內咏初成庾令樓中  
醉欲倒松醪椒醕滿金盃嘉客良朋逐夜來當筵光彩  
聊供覽不須催駕上瑤臺

聽鳥詞為陳惟允賦

烏烏烏鳴相呼朝飼雛暮飼雛昨日飼雛雛尚小今日  
雛飛烏已老老烏長日不出飛衆雛反飼啣食歸飛飛

不離君家屋夜後還來屋頭宿屋中主人千萬情見鳥  
得飼不敢驚願歸見親學鳥飼軒不名鳥人不媿

愛日吟為孫希範賦

讀書從教寸晷移照鏡不怕朱顏衰阿翁垂白年有限  
只恐鳥飛去難返人生在世誰無親亂來各自逃一身  
十家父子九離散似君團團能幾人白日可買金可得  
使翁壽長應不惜

望雲詞為貝公遠賦



朝望雲悠悠暮望雲漠漠望雲雲不盡思親雙淚落迢迢親舍東海濱但見白雲不見親得親身安年不老還家雖遲心亦好

蓼莪吟為朱公路作

昨日春雨好莪葉青青小今日秋霜飛青青盡枯槁秋霜春雨各有時兩丸東西寧少遲兒今得官親不在滿地寒蒿不堪採

歲晚行贈習尚鑪駕部

苦哉歲晚西風悲美人不來寒鴈啼十年裘馬走南北  
禿髮已白歸無期悠悠世事春前草淺碧嬌濃豈終好  
長路崢嶸驚馬勞坐覺令晨色枯槁海內英雄今幾人  
逢時吐氣干青雲當前勸酒君莫逆但願四海生陽春  
君不見昨夜天邊孤鳳鳴老夫伏枕雙涕零

梅花清夢辭與貝廷琚博士同賦

愁雲淡淡搖碧空瑣窻虛掩閑微風芳魂欲迷疎影亂  
滿庭細月香溟濛夜景沉沉春漠漠翠禽啼春春不覺

水泄銅龍漏轉遲霜華暗妬青綾薄惱情橫玉泣小鸞  
畫屏殘照圍素寒起來重覓舊遊處曉烟十二空攔干

海雪詞與唐處敬題

搏桑亭亭塵帖帖三山曲連屏樣疊馮夷竊得鮫人綃  
巧裁六花不用刀瓊芳攪空夜迷影神挾剛風去俄頃  
馬御骨戰泣貝宮咸池凍合烏愁冷回首烟生九點青  
冰車飛輪天上行下看荒月斜照城鼓角未醒雞無聲

雷雨護嬰詞

少婦抱兒行且遲雷雨路中忽遇之兒驚欲啼手護兒  
道傍逆旅固可依君不見王凝妻

五言古體

雜詩六首

雄京據咸陽百二連山河丹樓與翠館宮闕高我我天  
中王氣集物象正熙和清晨會軒蓋劍佩鳴相磨侍中  
複道上相國九達過侯王各建邸薨棟如星羅千金交  
趙客雙璧聘秦娥榮貴倫許史功業崇叅何勉彼蓬草

士壯志無蹉跎

其二

崔嵬南國山上有百尺松挺然為良材枝葉鬱蔥附  
根一何高雨露濯以蒙岩巒互叅錯危石當其衝匠者  
徒覬覦欲取無繇從所以千載間得免斧鑿攻孰云樗  
散木天年獨能終

其三

吉士篤古道狡人飾虛情為謙信寡過當任戒持盈叔

世俗多變結交諒匪輕聖主建廣業尚須多士成矧茲  
下愚質安可捐交盟竒計固云昧前籌愧無能立身三  
十年豈不志功名屢聞走韓魏亦欲接羣英反側吾所  
慮守已歎孤惲誰能斷金義相與濟危傾

其四

木橘何纍纍列生湘水湄年多逾茂盛土地之所宜美  
人渡江去分種淮山陲一旦變為枳遂令木性移勉旃  
君子操無為他人隳

其五

飛鴻渡衡湘遊戲寒江  
潯携羣復挈侶浩蕩同浮沉  
一鴻忽失意矍鑠乃見侵  
衆鴻不忍去徘徊發哀音  
悲風何所惡積水而又深  
欲渡那不得徒存恤鴻心

其六

扶桑靡由登六龍信難挽  
我何不量力欲使白日返  
短景苦相迫歲節忽成晚  
垂蟄念在春木落命歸本  
循環理固然天道豈云遠

讀史

周哀麒麟出漢末黃河清見之非其時徒有嘉瑞名古道既緬邈企慕惟空情茫茫千祀上此義聖所明

其二

堂坳不容盃渤澥納百川大小何乃殊其量使之然鄙人器易盈德士心廣淵美哉黃叔度千古稱其賢

其三

魯連天下士氣凌七國雄能令一箭書坐收聊城功秦



軍苟不卻高名亦成空當時受黃金遂與常人同所以  
有志士千古欽遺風

芟草

草生何離離沒我園中路每行又復止念我荷鋤去對  
此空歎息無由展幽步芟夷匪力殫沾裳畏晨露沾裳  
既不可此意向誰語棄置獨歸來且當息吾慮

次韻高士敏

魯連天下士倜儻好壯遊價直千里駒自非駑駘儔豫

讓稱國士殺身本無求人生豈不惜義在恩與讐吾也  
慕前賢所愧失進修黃金散還至白日去莫留持心諒  
難許知已不易投詎無三寸舌空有一弊裘耻隨鄉里  
兒紛紛競伊優去從李輕車托身欲終謀高名動羣雄  
壯氣橫九秋寶刀晝夜鳴逢人敢輕抽日高出蒲壘日  
入還莎丘邊風萬里來霜寒草颼颼歸懸白鵲旗斬得  
名王頭洗兵崢關雪飲馬黃河流天子不得見蹉跎反  
成憂日同博徒醉聊解平生愁一擲百萬錢一飲連千

籌丈夫志不遂有若疾未瘳時往如覆水在地誰能收  
何當謝塵鞅終焉事巢由

妙蓮禪院與王守敬燕

適從郡齋暇遂就中林約閒房夏景清冲懷付琴酌衆  
樹綠已稠時見餘花落池容泛斜影禽響喧幽薄佳朋  
自難并况值良辰樂

題兩伍張氏墓表後

古道遠難復澆風俗易便庸人但碌碌志士獨不然荆

楚尚事武寧論儒為妍企彼良伯仲委心惟簡編行義  
弗少虧墳簞日相宣仕途並榮踐藝圃從周旋光華灼  
邦懋裔嗣承家賢斯人竟緬邈儀容隔重泉芳蘭閼永  
夜宰木俱遺阡孰云天無知福善茲可鐫

舟行崑山懷陳惟寅山人

粼粼渡斜渚宛宛漾晴川日入風逾駛舉棹屢洄沿  
荇花拆還斂漪文斷更聯畔人歸負耒漁卽行扣舷煙  
鬱各閱態霞嶂獨逞妍睇近固流迅矚遠乃遲延羈懷欣

暫息離思愴仍緣安得偕吟侶觀瀾瑤華篇

卧佛宣講師經院贈李道人得處字

來尋講院僧遂到看經處  
疎雲翳涼霄竹色映逾暮  
入深鳥驚喧迴飈落高樹  
喜逢方外友遂適林中趣  
瞻詠更徘徊偶然忘去住

題虞山人家南軒

勝伯

榮名衆所慕隱趣良寡知  
君子苟明此意美神自怡  
伊人習嘉遯遠與塵世離  
崇軒結新構深靜抱林池  
高荷

既豐縟密竹更逶迤靈禽夕下渚涼颼晨汎漪  
銷觴置前席談燕無休時祛喧信成美為樂詎  
非宜來惟動情欸寄爽恒在斯

陪潘右丞燕集

輕颼變新燠疎雲釀微晴幸接芳時燕歡承嘉會情筵  
花始開杏谷鳥未聞鶯不盡杯中意更復駐前楹

八月十五夜飲王擴相川別業得動字

風高海雲收月出天宇空今夕寒暑均適與諸君共歡

深坐忘求契合飲易痛露螢寒不飛水鳥夜停嘒山精  
各潛匿銀蟾忽飛動亭亭廣寒桂不知何年種我欲問  
嫦娥素鸞無由控佳節屢變更壯心久慳恫人生非仙  
骨有樂當自縱惜無桓伊笛為爾作三弄

喜方張二山人見過

伊余積淵抱鬱鬱寡歡心披卷即追故撫景又悲今賴  
茲二三友攜挈遙相尋閱畊涉南畝屬望踰前林草木  
發佳色禽鳥相和音雖乏珍饈具清醑聊可斟豈惟事

言笑亦得弄書琴冷然郢中曲婉乎洛下吟微此良宴  
會離索信難任

懷陽山射瀆徐隱君行正

繁星麗遙漢薄露下秋旻仰瞻南飛鳥局束歎此身鬱  
鬱耿中情惻惻抱長貧流念故舊間矧是同宗親理歡  
竟無繇恨離還有因托棲北山表絕跡東江津青琴徒  
屢奏白雪亦寡聞空持蘭與貝誰為致殷勤

哀故樞密西夏邁公



邁公西夏英價重雙白珙早年氣骨爽已覩毛髮聳讀  
書敏前哲下筆脫荒茸鰲頭報奇捷書上天賜寵初為  
錄事長政治不憚冗德孚島民服勢屈苗獠恐奸邪循  
軌轍肯使駕馬覓粵洞蠻失調盜起蜎毛翫時公守團  
練士來若泉湧儲材無大小寧論梁與拱餽餉籍民給  
車輛再三輶非關威力加雅望素承奉大旗建高義所  
指無不竦行安牧溪變坐息暨陽詢餘民地旋復降敵  
道爭擁東州冠百越倚公丘山重世乏大將才今見儒

者勇兩府鶚交飛  
陞轉檄屢捧孰知孽臣謀陰黨三從  
吏倉皇朱亥椎禍及不旋種天將昌羣醜壞此長城鞏  
一軍失光彩衆庶盡躡踊獨幸子獲存拭目茂先種姓  
名空竹帛勲業付丘隴嵯峨會稽山碑石立孤塚英風  
朝夕興落落松栢拱我來弔遺烈淚下不可墮

喜潘牧胡布見過

麥候野氣和鶯時綠陰靜餘紅墜仍冒飛翠鳴還並歡  
承竹林賢情暢蘭亭詠湘雲簾上看郢雪琴中聽遠地

偶來居塵事因茲屏

過荷葉浦

粼粼水溶春淡淡煙銷午不見唱歌人  
空來荷葉浦無處寄相思停舟采芳杜

題銅塢後山石

山行興未窮復登白雲嶠石上識曾遊  
墨花破孤峭隣僧尚未見知有幽人到

燕余左司宅

初晴麗前楹輕寒逗幽院酒氣菊邊聞鑪霏竹間見禮  
秩俱澹忘情交自深眷嘉會在求期閒歡足清宴

題陳允中山居圖

昔年為客處看圖懷故山今日還山住儼然圖畫間泉  
來繞蘭徑月出對花關應知農事畢高坐有餘閒

池上晚立

芳草湛微漣高柳駐餘景喧喧林鳥繁鵲鵲虛烟迥幽  
情卒難愜因茲立俄頃

衍上人蕭然齋

高林洒繁露閒齋自翛然俄聞一葉墜應我琴中絃野  
水寒欲淺遙岑秋更妍清晨理梵罷窻扉靄餘烟

七夕有雨

錦機織初罷鵲橋駕始成每是經年別寧辭冒雨行雲  
帔從教濕月殿不須明但盡相逢意無語別來情

松路山岩圖

清溪入花源流水春溶溶趣深屢迴轉溪上森羣峰參

差樓觀間縹緲神仙蹤門陪羽客行時與樵人逢踈蘿  
映崖瀑薄雲蔭岩松孤鶴偶徘徊衆樹恒芳濃踐茲非徒  
遊要當盡從容固乏丹泉術終期此相從

獅子林竹下偶詠

客來竹林下時聞澗中琴經房在幽竹庭戶皆春陰孤  
吟遂忘返烟景生愈深

巨峯林館圖

林峯散芳氣泉木搖空濛雲房三十六竒渺烟霞中羽

人晞髮罷日出千花紅長吟招碧鳳小舞令青童融心  
醉玄液逍遙凌八風

題齋前蕉石呂志學嘗題此故落句及之

芭蕉倚孤石粲然共幽姿南風一披拂綠葉相參差新  
苞曉初解涼陰午正宜無由寫閒思對此詠君詩

惜嬰圖

佳兒逢吉日內人開慶筵蘭獻庭前瑞桂降月中仙長  
眉春與秀重瞳秋向妍客聞啼亦喜每看浴更憐擲玉

金  
卷一  
確為果貽金鑄作錢武攬華弓小文持湘管圓舊知熊  
入夢還徵鳳集肩積世寧無德傳家今有賢

何較理閣上觀梅

新構奐崇閣宿值發高梅的的循闌起矯矯逐簷來孤  
枝偶斜轉繁花俄驟開向日光浮袂凌風香繞盃平看  
信璫圓俯玩訝瑤臺法曹自能詠留題愧菲才

錢彥周軒前梧竹

種分嶧山表本移沅水陰風枝和奏簫霜葉應鳴琴池



秋色愈淨寬當蔭更深  
細花委夏井文實助春林  
何曾務直幹祇欲抱虛心  
君念記清隱余將期遠尋

悼胡氏妹

絲蘿既難附蕙蘭寧易親  
每稽通淑問那忘結素姻  
淚餘巾上粉魂棲帳底塵  
窻花始愁旦墓鳥亦悲春  
欲邀千古月照此九原人

題竹亭

斬伐來渭水結構比黃岡  
雨氣森遙席鮮色翳空梁  
焚

香碧雲合掃塵蒼雪香虛心絕外有抱節此中藏

劍池

在虎丘

闔閭試劍處靈泉湛澄靜苔花漬餘血石色帶古礦  
空山秋氣寒幽林夜光冷月明樹交壁人靜霜折綆古懷  
且當置清景庶足領

箭涇

靈岩山前

清溪無縈迴西望渺何極岸直形如刺波迅勢如射飛  
鷗訝流羽亂雨疑鳴鏑天狼不敢渡澤兕應當匿我志

弧矢間一覽如中的

題南窻

南窻對高樹中夏綠以枝偶然倚窻坐值此涼風時我  
非傲世者寄身聊在茲有酒但盡醉餘事非所知

中秋廣福院對月貽戴尚文主簿

秋色靜香臺冰輪雲漢開粲粲瑤華墮皎皎夜光來桂  
露濃棲席蓮香滿灑盃自欣陪笑咏更與駐徘徊

月潭泉上偶詠

長林行未竟羣峰俄聳青高石棲霞氣圓影抱月形鷺  
聲當聽轉蘿花逐援零更欲採靈蘊終將測窈冥

寄方山人借道書

神文越幽爽夙心允見傳未沐啟玄秘至使昧瑤編微  
病固期愈顏齡或可延妙理脫深悟靈淵曳五烟

沈校書宅燕集

初夏未知暑涼風覺微清殞池俄駭籜嚙枝屢聞鶯新  
蒲綠漸匝餘花韻猶呈有此玉樽酒可使景傷情

張文學席上詠燈鏡麈尾

各一首

曲屏啟雲母華燈繪洛神  
帶新看剪綺花明識鏤銀  
光淡楹間月烟融閣裏春  
紅熒照多處憐有按歌人

其二

賢鎔藉金冶托影待珠鉛  
藏將繡囊護臨向玉臺懸  
全明物自照半掩體仍圓  
應當頻摩拂誰得避姁妍

其三

山麈誰劇尾續紛縵長纓  
微拂塵應卻頻揮風屢生野

性知慕潔素手喜便輕相將恒在握逢人幸資評

詠屏送周伯陽

巧飾辭雲母圖畫此晴天密防宜便坐連張須廣筵月  
臨皎乃隱風當駛亦旋望處頻移障只恐見離船

題桂獨芳上人古香臺

花擅秋時盛根自月中分浥露何須折因風不待聞茗  
瀹承芳氣蘭蕤讓幽芬心清歸妙悟今古奚足云

獅子林池上觀魚

微微林景涼悄悄池魚出欲去戲仍戀乍深驚遂逸行  
尋曲島幽聚傍新荷密不有濠梁興誰能坐終日

松江道中

計程行苦遲望堠到知漸桃寒紅待拆蘼暖綠成染潮  
中蟹柵鳴烟際漁扉掩在路即多愁毋勞問夷險

尉杜二寅

天地一大環日月行其間人生稟造化在世間得閒走  
者無鰭鬣泳者無羽翰萬物各任性運動合自然君子

貴聞道何必多苦顏蜀道雖崢嶸不度何險艱世事雖  
歌傾處順何憂患請君聽我言君且收潺湲

眠雲軒

飄飄度丹檻冉冉棲瑤席拂衣疊輕素映帷變微碧  
氤氳多陰浩蕩春無跡偃體恒自便寓情諒還適

晚步

雨餘夏氣清烟聚園齋暮紅萱宿困蝶綠橘垂新蠶豔  
情盃裏融幽意琴中度蕭散且未寢遂適前度趣



寧真道館

林館高極爽微風送夏涼長席敷花艷空壇飄蕙香簷  
蛛忽墜網園蜂尚棲房臨尊復延咏因茲消日長

詠窻前梅

名園無襍卉幽窻對高梅晴艷微流席寒香暗繞盃的  
樂花間雪參差枝上苔歲歲春風首瞻咏此徘徊

尹明府吳越兩山亭

長江接海門一水限吳越兩山鬱相對峯巒各羅列勁

勢爭吐吞蒸嵐互出沒尹君好遊觀結亭山水窟闌干  
出層巔細路縈百折崩石絡垂蘿老樹着棲鵲平生登  
臨興盡為山水發不知嘗膽人此地幾征伐至今西山雲  
來往似奔突嗟余客江海所歷多奇絕何當上斯亭長  
歌吊遺烈

寄高士敏

霜楊漸摧綠汀霞猶駐紅寒節鬱易感惆悵此時中團  
沙止棲鵲驚颺迅冥鴻啟扉見殞葉循澗惜幽叢懷人

積瞻思咫尺何由同寧知登覽處結盟愈無窮



北郭集卷一

欽定四庫全書

北郭集卷二

明 徐賁 撰

五言古體

曉過震澤

遙天散曉華  
疎星歛微采  
鳥聲出林繁  
木葉過霜改  
荒村幾家成  
平湖衆星匯  
鷗夷覩無踪  
空煩艤舟待

贈毛鍊師環隱

造化固無盡周流行不息無端亦無倪萬古一太極道  
在隱見間動靜各有適人心秉至靈神用妙無測不知  
毛有道環中竟何得

西園看花燕集

暫輟南齋倦因就西園酌日臨花氣暄柳絆晴絲弱芳  
樽浥桂芬華筵藹蘭焯煩襟鬱易舒秩禮歡仍畧以茲  
協素懷庶可踐嘉約

蒼筤軒

小軒闕幽寂迴闌碧筠護寒色晴裊池垂稍曉縈露陰  
凝訝烟積籟起知颺度瑟瑟含夕清蕭蕭淡秋素不有  
虛心人何由同歲暮

懷李三莊

籬寒菊未折牆陰草易衰棲禽深避雨遊魚暗分漪幽  
居自多感況此阻良期雖非間川岳同晨悵離思

詠風

微微來綺陌悄悄通青瑣汎池蹴鱗文翻露墮珠顚遊

絲飄宛轉舞神吹  
婀娜拂絃清響流  
度林殘萼墮聞鈴  
屢不眠候旌因久坐

悼亡

月虧還再盈  
花殘有時芳  
之人逝不返  
胡寧不悲傷  
音容去未遠  
惚恍如在傍  
居外意在室  
還家始驚亡  
兒生纔乃月  
撫字憑誰將  
夜寒飢欲啼  
起坐但徬徨  
服御存舊製  
篋笥棲餘香  
欲覽復棄置  
涕下沾衣裳

菜羹為永嘉余唐卿右司賦



遠辭華蓋居來卜山陰宅乍到俗未諳久住地旋闢屋  
廬尚朴純楹桷謝雕飾高營踞山跗深甃逗泉脉簷將  
狼尾苦門用鼠筦織缺垣唯補蘿圯砌總蒙蘄編籬限  
邇隣樹枿表殊場本來是野性豈是耽地僻學圃欲擬  
樊為功敢侔稷寧惜勞外形自甘食餘力耕鋤限兒課  
灌溉當僕役破塊何昀昀陳器亦畎畎駕許俗士回屐  
向隣翁借筐筥織湘材鋤鍾鑄棠液卓鏤鷹觜利負蓁  
蝟毛礫俯仰疲桔槔沾洒漬襴襦循畦行策鏡偃林卧

歌石鑣披欲芟丘刈削竟驅礫值埠即為坡遇凹就成  
湍堤崩防密葭竇隙拒亂棘地同農畝計區學井田畫  
長畛縱復橫曲渠廣還窄接流引餘清疎沼匯深碧架  
桁秋實垂籬落夏蔓幕雨露加膏腴糞土發磽瘠識種  
題裹藏辨類分行植時法常按譜候時即看歷蔽芽拳  
握紫薑擎拇駢赤兩合憐薊擎叢生愛鉞芑初簪迸蟄  
雷新臺長春凍雀升莧葉我馬帚并莖直蕒繁微毵綿  
瓠老枯瓣拆芍苗卷龍鬚藥幹擁牛膝黃獨雪晴收紫

慕露晞摘陰堦茂蔗苞下田豐菲蔥捲輪木耳垂攢刺  
菱角射秋茄采更稀夜韭剪仍殖芝芳凝海瓊菱鬱點  
池墨枸杞香可醪竹菇熟堪腊石皮被柔薄土酥膾肥  
酌細尊入饌鱸鮮萋雜羹鮑荼苦蘗與儔薄脆冰為敵  
菌櫨西蜀致苜蓿大宛得長紫苻帶流亂簇陳絲繹芹  
效野人獻瓜為天子副音偏判也決明纔一方萵苣連數席  
瑤縻慰渴心玉延起羸疾葷毒笑非喜芥心泣詎戚盤  
根芽埋壤脫穎筍穿壁擷香憐雞蘊折甘嗜燕麥粟腐

切方圭乳餅斲圓璧孕子樓受剗贅聃石被馘兔目淘  
夏槐鹿角毛臘炙菁托諸葛呼巢以元修斤

諸葛元修  
二菜名

覓褒蔡守清徽怨周節逆邪蒿義所攘穢妄理堪啞薄  
利嘉拔葵省謗惡遺蕙窮餐齏酸黃儉啖薤留白閒情  
付田園生意仰膏澤莢齊翠疑剪甲拆綠訝擘掩丹烟  
際姿蔥蒨雨餘色始掇惜滓染載滌畏垂螫新薦或在  
籩薄湘亦須鬲求久漸投醪致爽遽沃醺不煩僚友送  
敬向先聖釋對屠誇大嚼燕客忻小摘拌羞不過三甕

喧囂厭已久閒居喜茲遂  
茆茨起高明澗道入深邃  
盤牖通震方開扉面離位  
藩編槿雜篁壁補蘿牽荔  
井欄旋解苞田植齊吐穗  
溪山固可娛風雨亦足庇  
到日始八九良友得三二  
客情卒難慊人性頗煩記  
時具茶果招或携酒肴餽  
感激壯歲心慰籍平生意  
茲欲尋幽期弗暇理塵事  
諸方未遍遊近處聊一至  
指引賴芑芻隨行有童稚  
陟怯危磴欹瞰訝頽岡陂  
褰蔓悟險途披叢見傾隧  
緩流似矜情舊藏欲呈瑞  
變綠亂藪薦發頽老

直當飫百未能著疏經安敢踰食籍旨蓄足山厨素供  
過香積用茲卒歲年庶得勤朝夕賓魏徐見厭厄陳顏  
自憚潔畚士恥污造橋盜懷恤抱甕忿設機授書誚求  
益用侯君房縱馬因致憂合蛭遂亡謫萬錢柳復乞片  
金華還擲仕知呂姪安居味鄭人識枕肱仲尼樂傷指  
范宣阮昺臍固云嘉食簞亦足適敷淡分所安堪味欲  
易極毋因口體累遂使愆民德

蜀山

在吳興弁  
山南十里

簷巢惡鷗野蒿食復生園棗啄將墜牧笛秋霜清樵歌  
晚風遲嵐光疑積愁谷氣如發喟對景獨感懷覽物各  
求類癘祝勞遠陪慵僕倦久侍歸時羣動息日脚在平  
地

步至西余山有詠

翫遊寡閒侶獨步思彌清迤邐適茲山于時蒞新晴雲  
容啟朝麗林采煥春榮煖崖芳卉集陽坂纖芽萌鳥逝  
何杳眇泉注每縱橫意會乃成坐興盡還復行此身在

葉醉深村羈旅絕荒山古祠閼厓攢紫閣陰松映綺䟽  
繖聖像委蒙塵靈幡颯驚吹青史失記名朱榜但題謚  
庭空衆草羅地僻百蟲歧鳴禽語供絃飄雲影翻幟螢  
停暗帷燈蝸篆仆碑字栢屢蟠輪困瓠子懸重脰喬林  
神鴉號卑薄鬼蝶戲甃虛泉脉通級夷石髮被怒蛙恒  
瞋睛痴螳忽掉臂鼠行黠無聲螳旋馴有次壞柱腐耳  
垂敗几蒸眼漬絲颺胃蠨蛸燐飛見魑魅螟蝨供後花  
猿窺祭餘器浮烟不熏爐溜雨常停解崩垣竄驚麋崇



貧賤庶少俗務縈緬懷羸臺子仰羨安期生非徒遊猥  
跡永締烟霞盟

張靜居寓菁山以清宴名堂要余題先以詩見美  
因賦此酬之并似周伯陽

山阿久寂寞堂虛歲亦陳自君此安處煥焉復崇新令  
德賁泉石流風播松筠列岩易常態諸澗澣來塵猿鳥  
若釋愧雲霞如返淳乃知景與物所據實在人棲隱雅  
足稱况彼有良隣念余本同趣琴酌恒許親晤茲信清

晏題名諒為真謬書忽見取來章誠可珍何以報淑躬  
篤好行載申

山居答北郭諸公見寄

葺茅古林隩闢蹊崇石根篠間伏驚犬桂裏過鳴猿穠  
春花蔭席涼秋月灑尊多君同遠好華札枉丘園

烏程危明府挽詞

製錦才堪仰埋玉恨難任銀章存寵澤朱琴失惠音賢  
知交士重愛說治民深未申為子養終辜迎母心

次韻答吳宗禹

佳景屬朱明，涼陰被池園。坐看寸晷側，歸禽清響繁。飲  
茲樽中酒，無煩問枰餐。辱君枉華翰，展覲散紆煩。所欣  
洽朋舊，徜徉自晨昏。形閒久息役，心澄始寧魂。微颺軒  
中來，悠然對琴言。

別呂山人獨還山中有懷

晨臚既同載，夕館今獨歸。林颺故蘿幔，池月淨苔衣。幽  
病傷久抱，良娛悵重違。欲弭茲宵恨，惟賴此音徽。

己酉歲冬苦寒

仲冬朔吹嚴雪零應寒候枯條競鳴宵頑陰互昏晝淤  
深途絕車冰閉城失漏窮谷噤孤猿叢澤匿羣獸梁園  
祇自誇袁門有誰扣寧忘噉糞塞每思射鴻囿鶴語固  
可徵鷗盟豈宜復更須挾重裘且當飲溫酎

遊西余山寺分韻得綠字

寶林被溪陰真境開山曲僧居慧日深佛處慈雲馥座  
蓮呈古青闌桂敷新綠水定育靈魚花奇致馴鹿勝因

托同遊清景行相續一從離喧囂終懷老岩谷

春日遊淨慈寺

看山候初晴連騎西湖道遙遙烟際墟冉冉風中篠  
谷寒聽鶯遲路遠逢花少林蹊幾登頓僧房更窅窳重來  
感昔時翻令失幽抱

遊南山燕集

俱在西湖

居隘局遐心騁望得崇險巖巒麗參差烟雲紛掩冉  
薰林識蘭氣縟岸炫桃燄鳥歌欲求和春波不加染延賞

合良儔摘辭愧余忝

和張文學懷吳興舊遊

雙溪滙中郭羣山帶高閨洲芳白蘋曉堂淨碧瀾春王  
孫各建第貴族自為憐醉邀射鴨尉門訪換鵝人回頭  
春遊女連手狎嘉賓畫舫垂楊雨組騎落花塵樂境倏以  
變賞事竟難循君懷茲念昔予愁方感新

蜀山館中

秋風吹練衣獨驚遊子心空山應金氣十日五日陰始

欣草木蕃復見霜露侵客館  
固蕭條豈無酒可斟臨觴  
反不樂所感親故深飛雲引  
長望鳴蜩續孤吟家鄉遠  
莫見斜陽罷登臨

入谷不聞鶯

幽谷物候遲黃鳥未弄音  
坐久聽逾寂衆木澄清陰  
辜此芳菲日何能慰吾心

夏至日北澗自留坐懷一二知己

日午步屨去行循北澗  
潄鮮衣因坐久對此嘉樹林  
雖

無薰風至微涼滿芳陰况茲澗中水汪然澄我心白鷗  
自蕩漾黃鳥有好音我有一樽酒欲酌還停斟安得携  
朋儔於焉共清吟

張山人別後懷

碧山既偕賞青谿條傷別遊絲行處墜雲光望中滅流  
思記幽蹤軫情眷芳節無由展良覲從茲委娛悅

登戴山

在湖州臨湖  
門外二十里

平田渺空曠孤崗忽高峙新松蔭其巔白石繚其趾初



登若嶄絕稍上乃如砥巖風蕩高寒微月中霄起亭亭  
日晷側肅肅征鴻駛南招天目雲北覽具區水比來局  
羈絆遊遨喜茲始同心良可重歡言得佳士非惟外累  
遺沉憂亦成委薄暮聊旋歸餘興會留此

題崔生南軒

軒居曠宜夏嘉樹覆前榮南風藹繁綠幽禽時一鳴理  
柳陽光啟奏琴涼月生逍遙自旦暮于以暢閒情

石帆山圖

石壁如飛帆天風吹不去千古障層空隱隱拂天柱遠  
映江上舟高出林中樹相望值春暮懷歸謾延佇

種菊

蕭條齋舍前隙地頗高爽茲焉倦耘鋤而乃成廢壤通  
來學種菊始為驅草莽掩冉籬落間枝葉紛以長雖煩  
灌溉勤亦藉雨露養秋香固所說晚節亦可仰匪曰表  
隱名聊以備幽賞

采蘭

采蘭江之濱蘭葉何靡靡采之欲遺誰將以贈君子幽  
蘭氣惟馨君子德惟美願言結同心終古詠無已

答張來儀嘉予見過之作

會合自昔有茲遇諒非常孰知謫餘者而復登君堂承  
顏愜素仰聆論慰離傷矧乃二月中物景屆春陽歷歷  
嘉禽哢靡靡衆樹芳清芬已云好重有酒盈觴詢候舉  
舊札攄情藉新章榮貴豈衷慕所蘄樂時康

復寓蜀山

肅舫自東來茲復寓衡宇雖非吾所居暫寓亦云主豐  
楚覆前田嘉蔬盈後圃力勤不自出食焉愧無補幸免  
異患干詎敢謝貧窶俛仰穹壤間微躬獲多祐

閑居

謝事返丘壑退耕理田園茲心獲遂初稍得酒中悵振  
策升崇巘揚舫溯長川驚湍信汨汨清溜自涓涓新蘭  
艷遲日密竹曳叢烟東館朝燕坐西林暮獨還朋舊固  
云曠山水聊夤緣居諠暫云遣習靜久乃便已幸駐靈

藥復能諷瑤編既無羨魚志外物非所遷

病中示游生兄弟

炎暑負微恙開軒來遠風空山何所有草木莧以豐終  
朝起復臥俯仰將焉從固乏賓友集諸生賴相同時令  
誦古詩聽之意無窮縱無飯疏食樂亦在其中

贈陸七處士

花源入逶迤蘿房隱蒙幕鳴禽護藥闌流雲拂琴席扣  
門僧共訪賭墅客同奕欲作山中期從君借遊屐

望雲

浮雲無定蹤游子有所思所思在何方迢迢東海涯雲  
來倏浩渺雲去還逶迤道路固云阻可望不可之托雲  
以思親朝夕如有依安得附冥鴻東歸奉庭闈孝感終  
當至彼蒼諒無違

傷往

憶昔始結髮相期終暮年寧知當壯時中路忽棄捐春  
芳每增恨秋月復娟娟嗟我客異鄉爾魂落夜泉兒生

缺撫育賴有兄嫂憐今夕已及期一念一涕連展轉不能寐起坐餘燈前

殘燈

閑房澹餘秋低燈耿寒夕孤明慘漸微斜照愁俞寂誰念殘光裏相看有羈客

賦得雪山送陳庭學

蜀嶺鎮金位巖壑皆古雪春風吹不消積厚凍愈結寒色照錦城皎若冰壺徹勢與太白抗崇險自天設君令

此宦遊一覽盡奇絕人繫山重輕相望並高潔

賦得獅子山送何本道

在南京

衆山何蔚盤到海勢愈壯一峯獨昂然踞若俊猊狀廉  
石駭鑿齒參差列其上乃知天設險氣欲壓羣嶂百獸  
遁隣藪畏懾不敢向我皇發奇觀層樓此將叔淮海迥  
相屬覽盡心目曠子今告我還於馬騁長望別離固足  
惜藉茲釋惆悵

賦得桃葉渡送宋仲珩



單臚餞行客曉濟桃葉渡粼粼起橫波冉冉明芳樹汀  
霞待日散風鴛向沙聚艷質悲已往穠景空延佇昔人  
既愴情茲離愈傷緒蘭觴飲為停桂檝理還住臨流悵  
莫追清歌眇何處

題王彥舉聽雨軒

高竹覆南榮寒蕉滿前渚蕭閒此中意適對清秋雨踈  
當簾外飄密向窓前聚聲聞俱雨忘悠然坐無語

贈朱道士默齋

遙遙紫霞境皓皓白玉京  
仰瞻上帝居飛觀森太清  
鳳采煥丹宸豹尾羅霓旌  
琅璫風中璫要眇雲間笙  
續紛寶花墮窈窕仙妹迎  
璫函降金籙宿契符端誠  
真人跽已受一悟超長生  
默然守元靜貞如保黃寧  
元氣融太和神光藹陽精  
九靈體至妙八景澄虛明  
以茲性命理遂藉丹臺名  
回念屬下土垂憫諸苦情  
能以刀圭藥濟度埃下氓  
稽首大道尊永踐崑崙庭

宿濟瀆齋房

暫息郡中事因就齋房宿靈風池上來花露洒餘馥遙  
峯對閒坐微涼愜新沐隣有道人往來踐幽躅

龍河寺夜聽份上人誦經

禪帷偶暫輟經筵時復登香風韻幽磬寶幢絢華燈音  
宣心所契聞洽慮俱澄愧余淪中品知師超上乘

賦得劉伶臺送丁掾之淮安

劉伶沛國人獨以好飲名每乘蒼鹿車出入攜瓶罍結  
交嵇阮徒陶然過平生妻言不足聽自謂能忘情常使

荷鍾隨已覺累爾形如何飲酒臺卻在淮陰城千年土  
花白尚疑壘麴成至今臺下草春風吹不醒君行戒農  
裝淮泗千里程登臺勿酹酒當誦周觴銘

送程校書昱分得柳字

離愁亂春鴻客心醉江柳送君官亭路忍把官亭酒遠  
別自足悲況是平生友行期似可緩何即遽分手鷗鷺  
鳴上下雲帆遞先後望望不盡頭落日三江口

賦得釋迦鉢贈慧古明上人

聖凡同有身飲食必藉器如來制石鉢匪特傳法嗣偶  
因受餘光相承成舊事遂令後代爭紛紛起嗔戾我願  
過量人要識拈花意

賦得露濕寒塘草送張來儀文學

寒蘼泣幽露清漪湛虛塘月時潤芳氣風處偃微光初  
溥叢綴白將晞葉翻黃欲采贈遠別沾衣徒感傷

晉冀紀行十四首

荆山揭高厓塗山聳橫嶸長淮出兩間中斷見斧鑿洪

流受東縛浪起石鬪角誰能為此功在昔大禹作至今  
遺廟存香火乃寂寞我來問邑人往事竟緬邈于時春  
正深草木尚荒落登臨欲開豁觀茲反不樂更傷卞和  
泣三獻空抱璞

右荆山

舟行夜達曙路入硤石口平山帶孤城一塔起高阜問  
知古壽春地經百戰後羣孽當倡亂受禍此為首彼時  
土產民十無一二有田野滿蒿萊無復識畎畝去程不

可稽欲望敢遲久

右壽州

秋日何淒其嚴風變陽卉嘉節叶重乾時菊芬且靡臨  
高一眺望俯見城郭裏三關為襟帶雙溪流瀾瀾浮雲  
起天末鳴鴻在中沚雖非吾故土但悅山川美獨游意  
尚適况茲值多士珍穀出豐厨吳萸泛芳醴人生雖長  
壽良時亦有幾對此不為歡憂思何由弭鑒此登山悲  
飄飄然已矣

右河口山登高

昔聞陽臺名今上陽臺路我因興古懷驅車暫停駐餘  
基尚突兀雲雨自朝暮哀猿失故聲野色賸孤樹當時  
襄王夢曾與神女遇幽冥事莫測萬載誰能悟平原亘  
千里巫山渺何處淒涼宋公子深情見遺賦

右陽臺

客程不論遠所愁在陰晦惡風滿川來雨勢晚逾倍船  
爭急流上寸進還尺退枯葭夾崩沙路轉百數匯颶颶



孤蓬外琅琅萬珠碎  
篙師左右呼坐客默與對  
去心雖云迫前途苦茫昧  
德星無復覩洗耳亦何在  
有懷仰高風令人發深慨

右潁川

前登盪子城山隘勢欲逼  
路迴土峭絕傍夾千仞壁  
石狀如矩斲巨細總方直  
無泉土脉死草木盡改色  
高巔有保障重門閉重棘  
陰慘行人險惡意叵測  
信知狐鼠輩得在此中匿  
我生好壯觀努力更攀陟  
立久日將

晡浮雲渺鄉國

右盪子城

峯迴抱深壑下視天鑿井昔人建重關扼險備邊警鍵  
鑰久已絕垣石尚森整我我尼父祠門掩衆山靜曾聞  
此回轍無復過斯境詢知鄉老言此事古未省餘氓數  
家在破屋暮烟冷我行力稍疲景物不暇領且為投宿  
來驚風夜愁求

右天井關

盤盤羊腸坂路如羊腸曲盤曲不足論峻陡苦躑躅上  
無樹可援下有石亂蹙一步一嗟吁何以措手足途人  
互相顧屢見車折軸少時徒耳聞今日親在目不經太  
行險那識安居福

右羊腸坂

陸行渴懷抱今渡沁河水奔騰走百灘聲遠聞數里我  
來坐其涯肩擔欣輦弛不意山塢間偶得見清泚連朝  
塵沙目豁爾淨如洗雖云倦行力對此亦足喜南風吹

青蒲白鷗忽飛起

右沁渡

一水隨山根宛轉流出迥灘聲繞縣門孤城數家靜風  
土殊可怪十人五生癭土屋響牛鐸壁滿殘日影行遲  
欲問宿連戶皆莫肯亭長獨見留半榻亦多幸呼童此  
晚炊糲飯穀帶穎野蔴不可得敢望肉與餅途行乃至  
此儉素當自省

右沁水縣

巍巍太陰山，崖壁拔嶄峭。積水嵌層壑，凜若太古造。凍  
深草木堅，僵立勢難撓。高寒橫障空，陽景未嘗到。隣有  
羲和墓，欲問莫可吊。如何於此地，獨不被臨照。至今山  
中鳥，無性識晴昊。聊為志其事，因之發長嘯。

右太陰山

土谷既深入，高山復嶢峴。微逕纔百尺，下轉十八盤。俯  
臨澗壑險，勢陡不可看。亂石闢磊砢，置足恐不安。長饒  
那可托，藤蔓無由攀。寸步每千慮，舉動如蹒跚。心膽掉

欲碎毛髮亦為寒戰兢尚未足何暇發慨歎平生行路  
心此日方知難

右十八盤

空山兩高冢媧皇此中葬焦土積層巘勢助殿閣壯大  
哉補天手功出千古上至今煉餘石火氣夜猶放轟雷  
常祓護烈風日掀蕩陰林慘可畏怪木高數丈百鳥飛  
繞枝欲止不敢向地靈氣所鍾祭禱土人仰經過謁祠  
下幸獲拜神像

右女媧墓

霍山古北鎮勢尊出羣麓山深異風景春盡樹未綠居  
人苦多寒鑿土為住屋屋頂土元厚亦種麻與菽乃知  
此方民猶有上古俗我欲拜其廟日斜去程促窰烟斂  
暝色牛羊半歸牧征途多嶮巖村館早尋宿

右霍山

右紀行十四首賁於洪武九年往山西與顧厓同受  
上命問俗於晉民自京師下長江歷淮蔡入大梁渡黃

河登太行覽唐虞故都周旋於吉絳汾沁間過鴈門  
代郡回觀上黨長平之舊跡跋涉五千餘里其間山  
河形勢佳景殊俗未暇盡述姑賦其萬一聊以擴吾  
之見聞云爾二月廿三日識

北郭集卷二



欽定四庫全書

北郭集卷三

明 徐賁 撰

七言古體

丙午中秋與余左司王山人高記室同過張文學  
宅看月

商飈吹秋天如藍出戶圓月生東南衆星次第歛芒角  
獨有桂影垂氤氳澄光無私照應徧不間污澤兼清潭

冰輪軋軋上銀漢玉龍左右駕兩驂須臾當天蟾魄正  
八表洞視明相涵自憐下界苦迫塞未得變化同書蟬  
遙思海上看更好水氣颯颯雲無曇鮫人機室仰虛炤  
綃絲薄袖抽冰蠶孕珠老蚌躍波出吸納華采爭研鎔  
山河大地影倒入嗟此尺璧何由舍曾聞月乃七寶合  
坳處修補須斤鑿又聞嫦娥竊靈藥直欲不死真貪婪  
如此怪事各有說理或有之幽莫探化橋擲杖本幻戲  
茲事何故推難諳分明以術誑人主不即加罪誠痴憨

今宵貴家盛開宴奔走席上羅女男清絃脆管樂正作  
金尊玉斚情方酣羈愁誰復念居者家無隙地惟書龕南  
隣庭院未為廣較之我處殊差堪便攜濁酒扣門去看  
核瑣細無煩擔移床露坐共邀月更呼故友來清談諸  
君豪邁總名士長材落落皆梗柟詞鋒出硯賭快利鈍  
斧寧敢膚長鐔胸奇每能幹造化語峭似可欺岩嵌我  
今結托豈偶爾內切自喜忘其慙當歌且用脫邊幅買  
酒奚問墮珥簪為君起舞明月下兩袖拂鬢風盤髮佳

節於人既不惡暢懷痛飲心所甘緣知樂景不易遇匪  
曰嗜好成淫耽此月一去又一載坐看直待雞號三

夜坐次高季迪

夜燈耿耿風帷低雨葉似秋寒更淒城遠擊柝慘難齊  
抱中幼子悄悲啼不知情思向誰是獨坐空房憶故妻

連理木為何垌賦

松陽之山如游龍粵羅浮原獨龍挺有墳莪莪樹且封  
誰其莖者楚國公楚公系同正獻宗煌煌炎宋祠業鴻

若子洎孫俱登庸德澤綿衍何其隆至垆七世慶未窮  
垆也孝義被厥躬祗卒黨序和睦雍上以承祀弗墜躬  
下以奉親能婉容昊天不憖降鞠訕羣醜戲兵儕螳蜂  
民居悉毀郊甸空母也奄忽時適逢葬地固差吉與凶  
倉皇原傍鑿幽宮禮弗克備誠忽忽明年又復殂乃翁  
五內摧裂號彼穹相原石塘氣鬱蔥僉曰合選母也從  
垆以體魄安其中而更發露寔所恫歲丙午春時雨豐  
連理木生元氣鍾巨幹開合數枝夔廿又四尺為其崇

望如車蓋儼童童山靈撓訶護芳穠禎奇孰云非化工  
於戲孝感天地通暴祥表瑞無以充乃於茲木照孝衷  
眉山記語具始終鄉人頌獎萬口同我聞其事愧愚蒙  
作詩聊以備采風

題鎔生柳庄

碧山綠水轉逶迤君家住處宛相宜春風繞屋楊柳樹  
為君爭發艷陽時艷陽時節風光早萬葉千絲向人好  
何如遺恨武昌門難同送別長安道拂烟照水更多情

枝間百轉有啼鶯嬌傾趙女筵前舞思入燕姬笛裏聲  
白花撩亂波搖蕩密影芳陰自來往坐邀釣侶把長竿  
行倩菱童棹孤榜記取前時親手栽絲絲葉葉費春栽  
願得傍人莫輕折歲歲年年春自來

贈巾工李澹齋

十年奔走風塵裏短髮脩脩被雙耳百回櫛沐向朝陽  
千度爬搔照秋水歲華冉冉逼我來相對雖悲亦還喜  
翻思離亂眼中人如此頭顱能有幾乃知鬢絲增老醜

逢人自覺吾形瘁  
吾聞李翁解作巾  
百錢買裹聊復爾  
舊藏白氎不易得  
古製平頭差可擬  
臨風見影頗自整  
只有羈人脫蓬累  
李翁李翁遺世者  
蕭然一屋吳興市  
全家但食賣巾錢  
能以此技代耘耔  
我因作詩貽李翁  
願翁子孫守翁技  
我今亦是織屨人  
同與徜徉沒餘齒

題葛仙翁移家圖

典午中衰亂人紀  
諸藩構隙兵戈裏  
江左名賢各有圖  
先生抱朴徵不起  
先生好學得異書  
九丹妙得玄中理



紫髯綠髮丰姿秀蕭然自是烟霞士當時入洛不論功  
榮利棄之如敝屣求丹願作勾漏令便挈全家度交趾  
南行適逢鄧廣州一留羅浮遂終此壇上時看藥竈光  
井中猶是丹砂水暫將勁翮戢鷦鷯躡景追風豈能已  
先生丹成骨已仙獨見文章在青史龍眠居士真好奇  
貌作新圖宛相似先生自騎黃鹿行僮僕提攜子姪倚  
藥瓢茶磨家具足前驅牛驪後厖豕乃知粉墨幻人化  
幹淡點綴無不美今日玉堂雪初霽展卷令我心神喜

特為題詩繼後塵再拜高風仰千祀

贈崔孝子

洪洞山前振鼙鼓東家被殺西家虜崔郎逃兵山更深  
手引諸兒背馱母須臾兵急行恐遲月昏霜滑山嶮巖  
大兒牽衣小兒哭心在護母寧戀兒倉皇棄兒巔岩裏  
永割慈情知必死明朝隣里忽抱還全家相看盡驚喜  
我知此事由衷情不有神護安能生兒今拜父孫拜母  
一家團樂居樂土

晚歸

樵風渡溪波蕩影水葉圓圓綠浮荇白沙路遠雲花靜  
小艇爭先野鶴歸竹外依微衆山暝

搖芳樓

高樓春多風日妍瑣窓瑤闌縈素烟水晶簾捲香散席  
瑤芳吹入琴中絃美人手度陽春曲水意山情斷還續  
三山鸞鶴夜飛來佩環搖曳玲瓏玉琴聲宛轉響春空  
滿樓白月梨花風

次韻王止仲見寄並東郡諸友

少年不用悲秋蓬致身豈但儒冠中壯心非干要夸世  
平生直欲圖成功枉將空言恣幽討徒采衆說相芟蘄  
全功獨取遼城箭大言誰信扶桑弓亦當殺敵白登道  
寧復獻賦甘泉宮英雄不作等閒事神仙自托浮游踪  
求名未解吐辨舌養壽莫必生方瞳微生自有造化繫  
皇輿已喜車書通按圖孰能索神駿抱璞未易逢良工  
散材遭焚固無用蟠根為器須先容以茲歎息委鈍質

匪云隱逸矜高風安時從此甘蘋藿傲世詎敢厭菲蔥  
衰榮來往培草木得失互有憐雞蟲龐公到老終食力  
樂布賤時曾賣傭狂歌每增慷慨意濁酒一洗芥蒂胸  
學書未必醉乃聖賦詩何待工為窮屢當求益懷故友  
獨恨作客來新豐明珠羞與魚目混美玉亦藉山石攻  
仁山道學麗白日少陵文采明秋虹又知席師學清淨  
可貴衍衲脩真空樂師老成飽兵學安石俊健夸文雄  
王家筆法到幼子高君奇句欺三紅相思寧問異遠近

結交尚賴全始終將來大器君輩是嗟此亂世吾難逢  
明朝東書過湖去放船鼓舵松陵東

次韻楊孟載觀芍藥作

輕陰釀綠寒猶薄窺甲疏簾映朱閣美人偏有惜花心  
新水銀瓶送紅藥當堦惟恐流塵污纖手籠春為花護  
一捻芳容飽弄嬌胭脂細結玲瓏露綵貼單屏襯碧綃  
微風纔動見花搖香凝膩粉肌全濕影艷方諸臉半潮  
高枝開滿低枝捲翠檻移來隨鳳輦濃染如分織女機

巧裁侶出宮娥剪花情最重是何人應有鴛鴦帳裏身  
不用傳心題綺字踏歌當為喚真真

題明皇夜遊圖

花萼樓前烟漠漠君王睡重無人覺別宮漏點戀寒宵  
閒卻梨園太平樂雲龍十二秋扶搖青藜化作黃金橋  
翡翠門屏桂枝影素娥羽帶香風飄優童共記霓裳舞  
歸來換盡人間譜梧桐擊碎教妖環蜀山夢戰漁陽鼓

月軒

蟾蜍飛去老不歿清光夜湧滄波起桂花露濕泣古香  
廣寒一色鋪秋水洞房深開雲母屏夢騎白鳳遊青冥  
冰輪碾碎山河影姮娥含羞舞不整竊得靈丹玉兔愁  
歸卧芙蓉碧烟冷

翠竹黃花二仕女圖

蘿屋綿烟歛微夕錦瑟罷彈機罷織寒濃翠薄妬蟬衫  
竹色搖風競疎碧鳳聲天遠誰能聞綠蛾黛影愁不分  
楚山九點昨宵夢淡花染盡瀟湘雲



其二

翠衫輕薄裁新蟬  
琅玕獻碧爭秋妍  
愁縈翠黛向誰是  
望中九點芙蓉烟  
泪簇霜痕紫雲淺  
曉色初凝寒意軟  
賣珠小婢未還家  
倚風獨看黃菊花

西山爽氣樓

錢塘西湖吾舊遊  
每遊只為湖山留  
欲將勝槩入登覽  
泉石瑣瑣何煩求  
古來英雄遠莫見  
往事寂寞誰復收  
知君平生好奇觀  
結樓卻在西湖頭  
山南山北競蕭爽

四時佳氣常如秋平波直與天上下衆峰不共雲沉浮  
此邦富庶甲西浙湖山宴賞無時休紛紛盡日逐歌舞  
安知中有萬古愁丈夫不作少年事與君買醉登茲樓

十二月廿一日尋梅到西塢留題山家

昨日看泉到山北石路巉巖苦攀陟尋源未窮力已疲  
百步無多幾停息今朝尋梅到西塢野曠霜晴好風日  
兩株卻傍山家開柴門翁菴連叢棘老樵出迎頗解事  
掃石坐我吟其側踈花吟蕊自逞妍不放寒香洗胸臆

何郎久沒杜陵老，好句獨有林逋得。  
花雖無情弗與較，嗟我懷抱花寧識。  
明當攜酒此間春，東風應念重來客。  
呂山人將來遊蜀山，因賦詩以要之。

草堂窈窕亂山空，流雲啼鳥路西東。  
薜蘿烟杳青林入，芰荷雨滿碧谿通。  
穠花芳月時時有，花月金樽長汎酒。  
蜀山茗水近相連，南風蕩漾木蘭船。  
閒陪釣侶蘆洲外，屢覓樵童松障前。  
樵童釣侶行相識，吳語蠻歌自朝夕。  
夢魂不解齊門竿，懷抱都隨謝家屐。  
山中風景獨君知。

結隣誰肯作幽期  
淮南桂樹秋搖落  
更為重吟招隱詩

鵲軒為王孝子作

金華山人王孝子  
自來生長金華里  
阿母初生孝子時  
鳴鵲飛來樹頭止  
子生日長母日健  
每聽鵲聲心輒喜  
鵲聲在樹母在堂  
孝子晨昏具甘旨  
願言阿母享遐齡  
鵲聲喳喳長在耳  
阿母生子願子賢  
今子作官東海濱  
一朝母逝鵲不來  
回首家鄉隔山水  
鵲不來兮其奈何  
母子恩情那得已  
天高地深恨無托  
作軒名鵲良有以

我亦飄零未歸客  
父母早歿失怙恃  
十年空守骨肉函  
有淚不入黃泉底  
故山非無一抔土  
長路風塵阻戎壘  
聞君孝行未識君  
為記詩章持送似

送主簿王儀中之華亭

山風吹霜溪葉老  
鼓笳欲斷天未曉  
行人出門雞亂啼  
北斗倒懸月在西  
我停露車客駐馬  
荒烟瀟瀟暗平野  
一杯濁酒且須傾  
九月垂楊不堪把  
歌聲感激絃聲繁  
座上醉人爭笑喧  
相逢相別皆草草  
心事紛紛向誰道

送許監事北遊

楊葉差差花簇簇離筵小宴春江曲金壺酒氣暖融香  
鶯簧初起鶻絃續絃聲未停君欲行晴烟濛濛搖雙旌  
平原細草塵不動馬蹄聲軟朱輪輕回颺吹斷東西陌  
蝶駭蜂愁日含夕歸來醉臥玉堂春夢裏雲飛苧山碧  
中秋夜淮河舟中看月懷張羽

長淮浪平風暫息萬里雲消楚天碧東方月出海門寬  
浩浩清河黯無色樓船伐鼓順下流今夕何夕當中秋

金繩轉影素華滿卸帆且作須臾留夜深人家市聲靜  
我獨高吟衆船聽思奪梁園席上才氣壓南樓座中興  
百年此夜不多好人世浮雲何足道雖有鄉心自感傷  
能無樽酒相傾倒人間清景不可并杯當暫輟歌亦停  
翻思年年看月伴如今落落如晨星此懷此念誰能識  
茗水東頭靜居客為渠寫作看月詩西方擬附南飛翼

皆山樓

昔聞仙人好樓居君來偶作樓居主軒窗虛明不受塵

獨有青山作環堵五湖風景供朝夕萬壑烟雲自晴雨  
殘岡斷隴走百折憑高一望無遺覩嗟余零落當壯年  
每到登臨即懷土眼中何處是神州落日秋風暗榛莽

春陰應秦王令 時在山西

雲花鱗鱗山漠漠重城平障芳陰薄膩雨輕吹飛復停  
勾引東風到簾幙草滋微濕沾芳塵隴頭不見尋花人  
桃英梅萼同懊惱水紋滿漲金河春柳絲暝濛烟不醒  
轆轤暫輟銀瓶綆新鶯未換谷中聲遊蜂竟失闌前影



丁香百結蕉有心綃屏六曲春沉沉香抽翠縷火長續  
餘寒撲錦籠朱琴江南春好多芳樹林園半是看花處  
明朝重整小紅車風光滿路行春去

楊孟載畫竹

江南看竹不為罕水郭山村常種滿東里千竿繞佛亭  
西隣萬本連書館密葉分陰小閣深斜枝度影虛簾短  
蕭疎夜月翠羽涼搖曳南風鳥聲暖嗟余好竹處處遊  
徑造豈減王猷誕湘江淇水無不到嶰谷柯亭亦嘗歎

人間音律性所好收作鸞笙與鳳管或裁文籜製小冠  
時尋新笋供清饌朝行竹下暮仍往自謂竹緣終不斷  
竭來并州苦寒地沙土撲面心煩懣寧無寒草共山花  
惟覺麓疎俗吾眼胸中塵氣久已積對此汾河詎能澣  
君心飽有渭川思揮洒風烟意閒散封圖遠送邀我題  
措語苦澁顏何報

秋江送別圖為顧員外賦

大江落日秋浩浩沙柳全消荇花老鴈聲先送客情飛


酒力仍將別情掃一程一水一烟波前程方長後程杳

二喬觀書圖

孫郎武畧周郎智相逢便結君臣義丰姿聯璧照江東  
都與喬公作佳婿喬公雖在流離中門闌喜色雙闕

大喬娉婷小喬媚秋波並蒂開芙蓉身嫁英雄知大闕

日把詩書自怡悅不學分香歌舞兒銅臺夜泣西陵月



北郭集卷三